

Cu presentacionnan unico y special.

Concierto Dominical Donny Lacle di september tambe dushi y unico

Resenya skirbi pa Ruthy "Lady Ruth" Vrieswijk-Bergen

E conocido y talentoso cantante, un hoben adulto conosi tambe como un di e piratanan di amor Edjean Semeleer a habri e concierto dominical den Manchebo French Steak House riba e ultimo diadomingo aki den e luna di september, yamando tur presente un feliz mainta y un bon bini caluroso, mientras cu pafor awa tabata yobe suavemente. Mesora e grupo di musiconan di FDEC (Fundacion Desaroyo Educativo Comunitario) a duna nan bunita presentacion di e.o. blokfluit bao e dinamico guia di maestro Lucio Rivadeneira. Por a gosa tambe di e presentacion di Buchi Boekhoudt y canto di Robert, cu mayoria biaha ta sinta den publico su mes, pero e biaha aki a wordo invita pa presenta un dushi cancion di Padu Lampe. Despues Efraim Antonio a duna un bunita introduccion di algun di e cantantenan masculino cu lo bai ta formando parti di e programa espectacular di dianan 30 y 31 di october venidero den Cas di Cultura, hunto cu Nilka Franka den e concierto di aña "Nilka Franka & Friends in concert". Pa hopi, esaki lo ta e concierto mas comenta di e aña aki, cu un di nos artistanan cantante mas famoso cu Aruba conoce. Mas y mas teener, hobennan y hobennan adulto ta conoce e gran cantante Nilka Franka conoci pa su cancionnan romantico, pero tambe movibel, un Sra. Nechi y elegante cu semper a keda e dushi y bunita hende cu e ta. Nilka lo ta e flamante roza mey mey di tur e sumpinanan masculino guapo, cantando den duo of como solista cu acompañaemento di e banda musical fabuloso di Robert Jeandor. Despues cu Tico Quillotte y Don Ramon Krozendijk a canta algun cancion romantico cu ta pas cu e dushi "weer" aki na Aruba, Nilka mes a toca e curasonnan cu dos bunita cancion, cu su stem

inigualabel. Como un sorpresa chikito Ruthy "Lady Ruth" Vrieswijk-Bergen a recita un poema "kort maar krachtig" pa Nilka, como un muestra di aprecio, amor y amistad cu hopi tin pa Nilka. E resto di e mainta/merdia aki tabata den man di e fantastico grupo di steelpan "The New Generation" cu a laga tur e curasonnan mas inspira ainda. Y Linda cu tambe ta gusta canta, a canta un dushi cancion cu The New Generation. Algun a los e pianan un crenchi, mientras otro sinta den stoel ta move riba e ritmo dushi di e grupo di hobennan aki, cu ta marcando historia musical cu nan grupo di hopi talento. Prome cu Edjean a clausura e programa di e bunita diadomingo aki, tur presente a canta hunto "Happy Birthday" pa un juffrouw dinamico di Mon Plaisir College Sra. Nora "Noortje" Chase, un hende muher nechi semper elegante, semper cu su sonrisa riba cara. Dobbel celebracion cu su 40 aña di servicio como maestra di scol y su edad bunita di 60 cu sigur ta yena cu hopi bunita experiencia, hopi amor, hopi dushi cuenta. Concierto Donny Lacle tabata tin bishita di mas juffrouw y ex-juffrouw di Mon Plaisir e mainta aki, esta Jufr.Y vonne y Jufr.Mayra. Nos tambe a subi pista un rato y a baila un pieza cu Sr. Efraim Antonio, un di e organisadornan y motor tras di "Nilka Franka & Friends in concert", y un dushi piesz carnavalesco cu Edjean Semeleer, kende ta haciendo un tremendo trabao como maestro di ceremonia den Manchebo Franch Steakhouse. Tur hende a gosa y pasa bon atrobe, y di curason mi danki na un bunita pareha hopi inspira, Glenda y Eduardo, kendenan a tolera mi cu mi "papiamento di mas" y mi mesun beisnan dushi na nan mesa, hunto tambe cu e simpatico Laureen, un di nos artistanan cu ta pinta cuadranan masha masha bunita ora e tin tempo como hobby, banda di su trabao



interesante y serio cu Digicel. Aruba cu a of ta ricibiendo keto bay bendicionnan di awasero dorna cu strena y lamper aki aya, a acepta un otro bunita diadomingo di Concierto Dominical Donny Lacle di curason.

